

JUDAS

É Kálara Judas

Mibóló

¹Judas, óloá Yesukristo ya mwanñan̄ Jakobo:
Ébe ébá bé ne ya ekígá, mindzindziññ ákála Tará Nzamá, bé tɔɔ
mbaalann ébe Yesukristo:
²Nyénánn engóngɔɔ, mvwaá, ya fe edziññ bíí kɔgle mína.

Minéneá meyágalé ya minéneá beyágalé

³Á mindzindziññ, me mana yaá vé nguú ése á mfá ye átsili mína ébe ákoroga é ne bíá fufúlu. Ve ma wórán ná ma yian mína tsili, meé lép mína ná míní yítan ákála mbwínánn bé kee yaá mitɔɔpban̄ eyɔñ evɔɔ.
⁴Amú ná bot benziñ bé ñíí yaá énzénzan̄ denan áswen̄ñ, ébá bété, atéé ye ókuá bá tára tɔɔ ntsilann á mfá akira te; be kaa ákɔ Nzamá wɔññ bété, é mvɔmm é Nzamá wea, bá veñan dɔ eniñ túga, bée tep fe é Mása mbɔɔ ya mbɔɔ wea, éñe a ne Ntí Yesukristo.

⁵Éde ma kómo mína vé osímánn ná, afán̄bɔ ná míní nga yem yaá dɔ ásesé ná, niané Ntí a ngá koro bot á sí ye Égipto été, véa a mana ywíñ é bot bée ndzí bwíni. ⁶Ya á mfá é baángel bé ngá bɔ kaa ábaale étɔɔ ye ósúá deba, fáve ná bé ngá lama étɔɔbɔga deba, a baale yaá bɔ mbéámbéá nkáán ya bekalamekéná, édwá dzíbi été, á mfá é mora mos ye á nkíkán misan̄. ⁷Amvála te fe Sodoma bá Gomora ya békísoan bé mbé bɔ á miféññ, niané bé ngá bɔ nsémm eveák ya akekwiñ ná bé nga bee fe bívée bée ndzí vele ya byɔ mot binam; bá téle bɔ amvála ané efonann ná bé dzuk ya akira ye é ndúán é ne mbéámbéá.

⁸Éde amvála te avɔɔ ya avɔɔ, bot bété bée bee biyéyemm, bá vé é ñúu deba mvin, bá tep fe edzwée ése, bée kɔbɔ ya menguu méye á dúmá ya abyann. ⁹Ve éyɔñ Miguel ntébosú baángel a ngá suñan bá débale bée bɔ mikéá ákála mbim Moisés, eé ndzí ñí nzomo ákɔbɔ bifíá bí nkíkán misan̄ bíye abyann, ve a ngá dzó fáve ná, “Ntí éñe aa vé wa mbámm!”

¹⁰Ve ébá béte, bá kóbo é mam bá dzími ya abyann; ya é má bá yem ané mot binam, amvála ané bétsít kaa kén, mam méte bá tɔbo ya mɔ nwúán ntuk. ¹¹Ngwáa ya ébó! Amú ná bé bee yaá é nzenn Kaín, ya fe ákála abúánn, bé kee yaá é ñúu deba évuzá Balaam, bé wú yaá fe ébe mbɔann bisó Koré.

¹²Bot béte bé ne bembéa métwánn méye á mefét mé edziŋŋ menan été, éyɔŋ bá dzí mefét mínabe bó kaa wɔŋŋ; béé kálá fáve bébyen. Bé ne mikút mí ne kaa mendzím̄m bivúŋ byá ke byá ke ya myɔ. Bé ne bilé bí ne kaa bibumá éyɔŋ byá bí nga yian yaá wúm; bí wú yaá biyɔŋ bí beáñ, bí mana yaá fe fumu á sí été. ¹³Bé ne mikebá mí é mán má ñan, mé nga kúlu ávúu é ne ósoán weba bébyen, atéteñ dá ke dá wulu ó yóp ya ó yóp, ébá béte bé téle á mfá weba édwá dzíbi é ne mbéámbéa.

¹⁴Ébá béte fe ébó, Enok mot ye myee bot zangbéa atéé ye nkɔɔ bot Adán a ngá kúlu medzɔ, eé dzó ná,

“Dággán! Ntí a sɔ yaá ya binzuk bí bot bíye mitɔpbán myeñ, ¹⁵á mfá ye ná aa kík bése sé misaŋ, ya ná ábwaaale bot bése ébe míbɔann míye ékúkwát deba, é mí bé bɔ yaá ékúkwát été, ya bembéa bé mam mése bembéa bebɔ misémm bé kóbo yaá ya Nzamá.”

¹⁶Bé ne beswa bot, bá kéá tám áse, béé wulu fe bívée byeba été. Bá kóbo bifíá bí elañ, béé kpoo bot mevoó, á mfá ye ná bé duan ya bó.

Ávé mibámm ávé melépgá

¹⁷Ve mína mindzindziŋŋ, símanán bifíá é baapostol Ntí wea Yesukristo bé ngá tára mína kóbo; ¹⁸ébó bé ngá dzó mína ná, “Ébe métám méye ásúgánn, bekpógo bot bá ye bɔ, béé niŋ amvála ané bembéa bívée bíye á nlém weba bí ne.” ¹⁹Ébá béte ébó bé ne é bot bá téñ nkánán mengamm, bot béye é sí ñí, bé ne kaa Nsísim.

²⁰Ve mína mindzindziŋŋ, vémpján á mbwínánn wenan wá daŋ eki été, míní yaglan fe á Mfúfúp Nsísim été. ²¹Mína bébyen tɔbɔgán édziŋŋ Nzamá été, míní yana nyénánn engóngɔɔ Ntí wea, Yesukristo, á mfá éniŋ é ne mbéámbéa. ²²Á mfá é bot bá sigbe, yénján bó engóngɔɔ. ²³Korogán ébá bevɔɔ, míní dzíga bó vea á ndúán été. Éde, yénján ébá bevɔɔ engóngɔɔ ya eko wɔŋŋ; míní vini fe atwaa étóp bé vé yaá mvin.

Bifíá bíye ávé dúmá

²⁴Éde ébe éñí a ne ewólo á mfá ye ábaale mína mína kaa kɔp obaá, a kéñ fe mína téle kaa meyeŋŋ ébe ású ye é dúmá deñ ya abwiññ mesán,

²⁵Ébe é Nzamá etámm a ne Nkoro wea, ákála Yesukristo Ntí wea, éñe á tɔbɔgé ya dúmá, ya ewólo, ya ekán, ya étɔɔ édzwée, atéé ye ókuá, éndagá, ya akekwiñ mbéámbéa. Amén.